



Tir Yimym

www.tiryimym.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimym@gmail.com

TAPAK 7

Yangia anidakangma :



Tir Yimym



tir_yimym



tir yimym

TAPAK 8

Liberal mayor Nicusor Dan-i Romania tir election kokogo

Ajax Coach Francesco Farioli-i mapa toktsüogo

VOL. XXII ISSUE NO. 215 (ADOK 215)


DIMAPUR

SANGTENNÜ (TUESDAY)

MONUPII (MAY) 20, 2025

₹ 5.00

India nung nisung 257 dak Covid puteta lir



New Delhi, May 19, 2025

(Agencies): India nung tang nisung 257 dak COVID puteta lir aser parnok teimba Kerala, Tamil Nadu, aser Maharashtra nungi lir.

Ajsüaka ketdangsürtemi India nung COVID-19 tensa azüoka lir anungji maoksatsü metetdaksüogo.

Southeast Asia nungi COVID-19 variants aruba ajanga nisung aika dak puteter ama bilemer.

COVID-19 indang JN.1 strain ya mezüing August 2023 nung putet aser World Health Organisation (WHO)-i December 2023 nung iba ya 'variant of interest' ta züngsema liasü.

JN.1 variant ya Omicron BA.2.86 variant nungi jakzükba lir aser mutations 30 shi lir ta WHO ajanga ashir. Mutations 30 rongnung LF.7 aser NB.1.8 dena lir aser tawa item ya kanga putetogo.

Southeast Asia nung COVID-19 wara tasen adokogo aser iba ya Hong Kong aser Singapore nungi Thailand tashi nung menatepa aoer.

Southeast Asia nung putetba

ya Omicron variant JN.1 aser iba nungi jakzükba aoba variants teimba lir.

Tan May ita tetenzüklen Singapore nung nisung 14,000 tema dak COVIC puteta liasü. Hong Kong aser Thailand nunga nisung aika dak puteta lir.

Hong Kong, Singapore, China, aser Thailand nung COVID menatepa aoba ya antibodies tashimait akümba ajanga lir ta ET HealthWorld ajanga ashir.

Iba ya India nunga ataloktsü aser Tamil Nadu, Kerala, o Maharashtra state tem nung tera menatepa aoba puteta lir. Ajsüaka India nung COVID-19 tensa azüoka lir ta health ketdangsürtemi metetdaksüogo.

India nung celebrity kar dak COVID-19 putetba osangtem lir. Australia nung cricket asayar Travis Head dak COVID putetba ajanga IPL nung pa masayatsü ta social media nung osang prokshir. Sunrisers Hyderabad head coach Daniel Vettori-ia Travis Head dak COVID putetba osang jangjatsüogo.

Külen, Bollywood actress Shilpa Shirodkar-ia Hombarñü la dak COVID putetba osang metetdaksüogo.

Tang tashi nungbo COVID-19 variant tasenba ya kanga shisabulutsüsa osang kecha mali saka virus memenatsü atema kümdanga alitsü nüngdaker, kechiyong 2020-2021 nung iba tashidak ajanga alima nung timtem kanga agütsüogo.

Shirui Lily festival atema security akangshir

Imphal, May 19, 2025

(Agencies): May 20 nungi Manipur nung anogo pungunü Shirui Lily festival jakdang ketdangsürtemi Imphal aser Ukhrul tsüingda kilometer 80 lenmang nung security akangshiogo.

Iba lenmang nung garitem mita repranger aser patrolling senzür ta ketdangsür kati ashir.

Kuki telok kari 5 buba Shirui Lily festival nung adentsü aliba Meitei nung amokmerenba sülen security akangshiogo ta pai ashir.

Anogo pungunü benjung ya state flower Shirui Lily tushia amungtsü aser iba naro ya Tangkhul Naga nung teimba ser aliba Ukhrul district tenemlen angur.

Tourism aser tanga department tem nungi ketdangsürtem Ukhrul district tonga aruogo ta police ketdangsürisa ashir.

Mahadev ajanga Yaingangpokpi nungi Litan tashi lenmang nunga security maparen inyakogo kechiyong idakji Kuki

yimtsüing kar lir ta paisa ashir.

Central aser state forces-i Ukhrul district nung security shitak agütsütsü inyaker. May 20 nungi May 24 tashi central aser state forces nübo talila mapa lemzüksütsü.

Tangkhul Naga nung volunteers-ia security forces den yaritepa Imphal nungi tourists arurtem anepalur.

Meitei nung amokmerenba osangtem süoki ia bilemer aser bushisüingdang südar ta Deobarnü Manipur Police-i shia liasü.

May 2023 nungi Meitei aser Kuki-Zo nung tsüingda rarayonga arudang nisung 260 tema taküm samaogo aser meyrjang aika pei talidak toktsür jena ogo.

N Biren Singh-i Chief Minister menden nungi sodi agiba sülen Centre sorkari February 13 nungi Manipur nung President's rule benoka lir. State assembly kümsük ya 2027 küm tashi lir saka tang suspended animation nung yua lir.

State sorkari nangzükba sülen CNCCI-i lungkak aitiba anenogo

District 9 nung 'voluntary indefinite shutter down' takok ngua agiogo



May 19, 2025 anüingdang Dimapur jila tiyongtsü nung dokan ajak shibanga aliba angur.

Dimapur, May 19, 2025 (TYO): Confederation of Nagaland Chamber of Commerce and Industry (CNCCI)-i Hombar nikongdang 6:00 ako nungi mapang telatet makai shishilembabaren shibangba anenogo.

CNCCI-i akhangba onüktem state sorkari agizükba sülen parnoki lungkak aitiba anenba osang metetdaksü.

"State sorkari district 9 nung District Chamber of Commerce nungi teshimtet nübo kaka dendaktsütsü tezüluba nung nangzükba sülen lungkak aitiba anener" ta CNCCI president Dr. Khekugha Muru-i ashir.

State sorkari taruba Cabinet senden nung iba ken o benoka angatetteptsü ta Dr. Muru-i ashir.

District 9- Dimapur, Chümoukedima, Niuland, Peren, Wokha, Zunheboto, Phek, Tsemnyu aser Meluri nung voluntary shutdown 100% liasü. Iba sentong mepetmesü kecha melii dang agiogo ta paisa ashir.

Sorkari nangzükba ama meinyakra Nagaland kübok district 17 prong nung shishilembabaren ajunga shibangtsü ta Muru-isa metetdaksü.

Tanü shishilembabaren takok ngua mokdangba ya public aser shishilembartemi yaritepa ajanga

lir. DCCI temi public aser shishilembartemi ajangzükdaksütsü atema urban local bodies nung shilem agitsü akhangba parnoki pusema nungitba atema pelar ta paisa ashir.

Tanü Dimapur nung shisaliok rejutem, office aser bank ajak lapok saka dokantembo shibanga liasü. Külen gari senzüsenbongba menokdangaka garitem kangabo mesenzü.

CNCCI-i ayongzükba sentong den meyariteptsü aser shishilembartemi tetsübu kecha melii dokantem lapoktsü metetdaksür ta yashi Dimapur Municipal Council (DMC)-i metetdakja liasü.

India nung Pakistan atema itdangiter nisung 9 pua lir

New Delhi, May 19, 2025 (Agencies): Kiralongrartemi Pahalgam amakba sülen India ketdangsürtemi state asem nung Pakistan atema itdangitar nisung 9 tashi puogo.

Ketdangsürtemi Haryana nung nisung 4, Punjab nung 3, aser Uttar Pradesh nung ka puogo.

Hisar police-i travel vlogger ka apuba sülen tsükchir lintüktemi lanurtem dak tenük yoka inyaksangshiba osang sangoktsü.

"Sen zübazüba angutsü atema lanur influencers-i tim masüba mapa inyaker" ta Hisar SP Shashank Kumar Sawan-i ashir.

Jyoti Malhotra: Travel vlogger Jyoti Malhotra-i 'Travel with JO' ta ser YouTube channel ka lapoka lir aser la ya Hisar, Haryana nungi lir.

Arishi küm 33 tain Jyoti-i Pakistan den Indian military osang lemsatepba atema apu. Lai Pakistan High Commission nung ketdangsür ka den metettepa aküm aser anaben tashi Pakistan semdangogo ta police-i ashir.

Pakistani intelligence nisungtemi la ya India nung parnok asoshi teyariteper tajung ka asütsü meranga aru ta police-isa ashir.

Davender Singh: May 12, 2025 nü Khalsa College, Patiala nung political science kaketshir Davendra Singh Dhillon (25) apu.

Facebook nung pai pistol aser prangpong noksatem upload asüba atema pa Haryana kübok Kaithal nung apu.

Pa dang asüingdangya asüandang pai yaküm November ita Pakistan semdangba aser Inter Services Intelligence (ISI) spy agency den osang lemsatepba nangzükogo. Paisa Patiala military cantonment indang noksatem lemsatepa liasü.

Nauman Ilahi: Haryana nung security guard inyaker Nauman Ilahi (24) Panipat nung apu. Pai Pakistan nung ISI handler ka den tongtepratepa aru.

Nauman ya Uttar Pradesh nungi lir aser osang sangoktsüba atema Pakistan nungi sen yok ta police-i ashir.

Arman: May 16, 2025 nü Haryana kübok Nuh nung Arman (23) apu. Linük ana tsüingda tensa mejungi alidangpai Pakistan nem osang agütsü ta police-i ashir.

Tarif: Haryana kübok Nuh nungisa Tarif apu. Arman apuba sülen anogo ana lir Kangarka

village nung pa apu.

Tariff-i police apuba sülen pa indang mobile nungi chats kar agentsü merang. Pa indang phone nung Pakistani WhatsApp numbers nungi data kar ngutetogo.

Shahzad: Deobarnü Uttar Pradesh kübok Rampur nung shishilembar Shahzad apu. Special Task Force (STF)-i Moradabad nung pa apu.

Shahzad-i national security dak sendakba osangtem sangoktsü aser pai aiben Pakistan semdangogo. Pai ozüing alema cosmetics, clothes, aser spices shibelenba mapa inyaka aru ta police-i ashir.

Mohammad Murtaza Ali: Gujarat Police-i Jalandhar nung Mohammad Murtaza Ali apu. Pai Pakistan ISI atema itdangitraba mapa inyak ta intelligence osang angazükba sülen apu.

Ali-i pa sasa mobile app ka yangluba ajanga osangtsüsang belen. Pa ket nung mobile phones 4 aser SIM cards 3 ngutetogo ta police-i metetdaksü.

Maneni, Punjab nungi nisung ana- Gazala aser Yamin Mohammad na pua lir. Tenatia Pakistan den osang lemsatepba atema tai tonglokja apu.

Village Council Hall dang Panchayat Hall majatsüla: T.R. Zeliang



Nagaland Deputy Chief Minister, T.R. Zeliang-i May 17, 2025 nü Peren District kübok Kejanglwa Village indang Village Council Hall semzüksü dang tangokba noksa nung angur.

Dimapur, Monupii/May 19 (TYO): Nagaland indang Deputy Chief Minister, T.R. Zeliang-i May 17, 2025 nü Peren District kübok Kejanglwa Village indang Village Council Hall semzüksü, koba DUDA kübok yanglua liasü.

Iba sentong nung Deputy Commissioner, Peren, Hiazu Meru aser danga ketdangsürtem dena liasü.

T.R. Zeliang-i iba sentong nung jembidang, Nagaland nung Panchayati Raj System sülen manidaker, koba Indian Parliament nung 1992 nung agizüka April 24, 1993 nungi amshir ta ashi.

Ajisüaka Nagaland nung Nagaland Village and Area Council Act, 1978 kübok amenokba Village Council System lir, aser ibaji ajanga Village Development Board (VDB) agütsür. Anungji Village

Council Hall dang Panchayat Hall ta majatsüla, ta pai ashi.

Indian Constitution indang Article 371 (A) kübok asenok tamangba yimsü, Social practices, Customary Law and Procedures, Administration of Civil and Criminal Justice temeden amshir, ta Zeliang-i ashi.

Zeliangrong Customary Practices nung Village Council Court ya tsünglangba aser tematiba court lir, aser nisung kari ali kimong mangatettep, kiyimba mesüra balaluyuba aser danga inyakyim dak sendakba nung Village Council ajanga obendang agütsüba anema High Court mesüra Supreme Court dangi ora itemji Zeliangrong kin indang customary system nung aibelenba lir, ta pai ashi.

District Head Office timba nung local nisungtem yokba, tongtipangsa DC aser SP inyaksü yokba ya Village

Councils temi Civil Society Organisations aser Tribal Bodies teyari nung customary system of governance tajungba nung inyaksü asoshi lir, ta Zeliang-i ashi.

Ano district nung scheme balala kübok lenmang teyangludak aliba indang jembidang, item lenmang renemba ajanga Kejanglwa yimtsüng kanga ajangzüka Jalukie aser Peren jila tem den tesendaktep tajung alitsü, ta ashi.

Iba sentong nung DC Peren, Haizu Meru; Kejanglwa Village Council, Chairman, Namrachang Hegui aser Kejanglwa Youth Organization, President nungeria jembia liasü.

Iba sentong nung Village Council Secretary, Hiareu Ndong menden liasü aser Head GB, Hubagwang ajanga melepzüng o jembia sentong tembang.

Mejangjaba nisung tasü mang ka nguteta lir

Dimapur, Monupii/May 19 (TYO): Mejangjaba nisung tasü mang ka Gurudwara, Dimapur anasa lenmang nung mejanga lir ta May 18, 2025 nikongdang 7:40 ako meta Sub-Urban Police Station dangi osang ka aru.

Iba osang angashir duty nung alirtem iba tesemi ao aser tasü mang meita reprangba nung yiruba zübu mesüra temulung melemettsüsa mapa inyakba mongutet, ta Dimapur Police sangdong ka ajanga ashi.

Iba nisungba ya talidak ki maka aser Hindu nunger ta osang angazük. Ozüng agi melaba maparen ajak tembangba sülen tasü mang ya PM examination/identification atema District Hospital Dimapur Morgue nung bener oa lir.

Kibur/kinunger/tembar temi Officer-in-Charge, Sub-Urban Police Station, Dimapur den Mobile No. 7085055026 ajanga tongteprateptsü ayongzüker, ta sangdong ajangasa ashi.

Dimapur nung Byatikram Education Conclave 3.0 agi

Dimapur, Monupii/May 19 (TYO): St. Mary's Higher Secondary School, Dimapur nung May 17, 2025 nü Byatikram Education Conclave 3.0 sentong takok ngua agiogo.

Iba sentong nung tesayur, kaketshir aser tongtipang nisungtem adenshia academic excellence indang benjonga liasü.

Nagaland Angh La Ganesan-i sentong nung jembidang, iba ama senden ya shisatsü balala mapa kuma melendaktsütsü asoshi sapang tajung lir ta ashi aser shisaliok ya academics kisüng masü, ta ashi.

India nunger sobaliba medemdanga jembidang pai bendangeri yimsü asüba mapang timtem ajuruba, nüchiso asoshi mapang talangka raraba bilemtet aser Bhagat Singh, Rani Lakshmi Bai, Subhas Chandra Bose ama revolutionaries aser Mahatma Gandhi-i aniba non-violence resistance tushia liasü.

Nüchiso anguba sülen India rongsenketzüng tsütsü tebilemtsü jenti ajuru, saka linük balalai yariba ajanga junga akum, ta pai ashi.

"Tanü India ya alima nung economy tulutiba jenjang pongu buba nung lir aser taruba küm tashinung Japan alemtsü. Asen mission ya 2047 tashinung Viksit Bharat akumtsüba lir," ta Nagaland Angh-i ashi.

Arishi küm 80 tain Angh-i 2047 nung pa takum malitsü saka ni tanaben soa nenoki yangerba India takok asoshi benjongsü amanger ta ashi.

Pai kaketshir, mapa balala inyaker aser lenirtem dang linük tarutsü asoshi khuret angateta inyaksü ayongzüka liasü.

Dr. Saumen Bharatiya, Patron-in-Chief of Byatikram Group ajanga sentong nung adenertem pela agizük aser iba sülen takok tajung anguba kaketshir nem tetushi agüja liasü.

M Chuba Ao, National Vice President, Baratiya Janata Party & Chairman of MARCOFED, Government of Nagaland aser dangartemi tajungshi o jembia liasü.

Iba sülen National Anthem tena sentong tembang aser iba sülen sobaliba saya sentong agia liasü.

Longleng DPDB senden menogo

Dimapur, Monupii/May 19 (TYO): Longleng District Planning and Development Board (DPDB) senden May 17, 2025 nü MLA aser Chairman, DPDB Longleng, A. Pongshi Phom lenisüba nung mena liasü, kong MLA B. Bangtick Phom dena liasü.

Senden nung MLA Pongshi Phom-i jembidang HoDs ajanga dang pei mapa nendaka inyaksü aser pei posting tesem nung alitsü ayongzüker aser tajungba nung amalitep akatsü asoshi MLA anaprong dang scheme aser project balala indang osang agütsütsü ajungshi.

Taoba Longleng DPDB senden nung lemtetba lepa reprangshiba sülen Bura Namsang nung EBRC Hall amenoktsü aser Government Middle School Shamkang ya Government High School dangu upgrade asütsü indang jembia aser Bura Namsang nung EBRC Hall amenoktsü mulunga agizüker tim department dangi yoka liasü. Ajisüaka Government Middle School Shamkang upgrade asütsü onük

ya taruba senden nung jembitsü lemtet aser DC Longleng ajanga District Education Officer, Longleng dang kanga junga asadanger taruba DPDB senden nung osang agütsütsü nungloktsü.

Deputy Commissioner-isa Heads of Department dang district level committee senden nung teti adentsü aser parnok melen dangar meyoktsü ajungshia liasü.

Kasa senden nung MLA B. Bangtic Phom lia MLA & Chairman, DPDB Longleng, A. Pongshi Phom aser Deputy Commissioner, W. Manpai Phom nati Registration of Births & Deaths indang sensitisation material sayatsü.

Senden nung District Sports Officer-i Longleng District Taekwondo Association ajanga July ita 35th Taekwondo Championships ayongzüksü ta metetdaksü.

District Sports Council Longleng tenüng nung pai officers ajanga dang iba sentong nung yariteptsü ayongzüka liasü.

Chümoukedima nung lokti nübuttsük ayongzüker



Medziphema aser Chümoukedima district nung May 17, 2025 nü lokti nübuttsük alidang nüburtemi shilem agiba noksa nung angur.

Dimapur, Monupii/May 19 (TYO): Chümoukedima district nung tzüngluruwa tenzüka mapang aser pre-monsoon preparedness mera ka ama District Administration ajanga Chümoukedima district nung May 17, 2025 nü lokti nübuttsük sentong ka ayongzüka liasü.

Chümoukedima temürekba aser tajungba nung ayutsü asoshi nüburtem angatetdaksütsü aser telungjem adokdaksütsü nükjidong nung iba sentong ya ayongzüker, kong kilentzü aoba lenmang nokdanga aliba lapokba, kisü-jensü nung amshiba oset aser jana mürekba, ayi mürekba, jana

indokba aser nüburtemi amshiba tesemtem müreka ayuba nung rangloker iba sentong ayongzüker.

Iba lokti nübuttsük mapang dokan aser business establishment ajunga anepdang 6:00 ako nungi anüngdang 12:00 ako tashi shibanga Chümoukedima district kübok Heads of Offices aser Institutions temi pei office/reju temeket aser tongtipang tesemtem müreka liasü.

Kasa mapang EAC, Seithekema, CTC, PWD (NH), PWD (R&B), WRD, PHED, Fire & Emergency Service, aser 1st NAP Bn den Village

Councils temi 3rd Mile Airport culvert nungi Chathe apu (Patkai apu) tashi NH-29 müreka business establishments ajungai shilem agia liasü.

Village Councils aser Colony GBs temi ketdang süa district nung nüburtemi pei aliba ki kima, kiyong, kilentzü aoba aser lenmangtem müreka liasü. Maneni dokan kibur temia pei aliba tesem nung lenmang aser kilentzü aoba lenmangtem müreka liasü.

Chümoukedima Town Council, Medziphema Town Council aser Village Councils balalai tesem balala nung jana indokba ketdangsüa liasü.

PRESS MEET

19th MAY, 2025 DEHRADUN

GOVERNMENT OF UTTARAKHAND



May 19, 2025 nü Dehradun nung osangbenertem senden ka nung 16th Finance Commission of India Chairman, Arvind Panagariya-i jembidang tangokba noksa nun angur.

India nung Pakistan atema itdangittsür nisung 12 apu

New Delhi, Monupii 19 (Agencies): Pakistan atema itdangittsüba dak sendakba nung tesüiba hopta ana tsüingda police-i Punjab, Haryana, Uttar Pradesh aser Delhi nung nisung 12 puogo; parnok rongnung YouTuber ka, tetsür ana aser postgraduate student ka densema lir.

Police-i Punjab nung nisung trok apu, Haryana nung nisung pezü aser Uttar Pradesh o Delhi na nung nisung kaka apu.

Tai tonglokja alirtem jagi New Delhi nung aliba Pakistan High Commission nung ketdangser, Ehsan-ur-Rahim den tongtepratepa liasü. May 13 nü Rahim India nungi meindokogo.

May 4 nü Punjab nung Amritsar kübok Ajnala nung Falaksher Masih aser Suraj Masih na apu. Tenati Pakistan ketdangser denji Army cantonments aser air bases indang noksa aser osangtem

lemsatepa liasü. Tenatisa arrtsülen sepaitem senzüsempogba itdangitba sülen Pakistan Inter-Services Intelligence (ISI) den lemsatepa liasü.

May 11 nü Punjab Police-isa Malerkotla nung arrshi küm Guzala aser Yameen Mohammad na apu. Tena jagi UPI ajanga Pakistan nung ket nungi sen 30,000 ngua liasü.

Asüngdangyaba mapang nung Guzala-i, lai Pakistan ketdangser den osangtsüsang lemsatepba atema shilem ana lemsar sen agizüka liasü, ta nangzükogo.

May 15 nüa Punjab nung Sukhpreet Singh aser Karanbir Singh na apu. Tenati Pakistan den Operation Sindoor osang lemsatepba den külemi Punjab, Jammu & Kashmir aser Himachal Pradesh nung sepaitem senzüsempogba osang social media ajanga lemsatepa liasü.

May 15 nü Haryana nunga

Panipat nungi arrshi küm 24 Nauman Ilahi apu. Pa ya Uttar Pradesh kübok Kairana nungi lir aser factory ka nung security guard inyaker. Pai Pakistan nung den osangtsüsang lemsatepa liasü.

May 16 nü Kaithal nung postgraduate student Devender Singh apu. Yaküm November ita nung pa temeshi aini Pakistan-i ao aser meyipa aruba sülen pai Pakistan nung den tongtepratepa liasü aser Patiala cantonment noksa lemsatep.

Ano Hisar nunga YouTuber Jyoti Malhotra apu. Lai Ehsan-ur-Rahim den tongtepratepa liasü. Tang la police ket nung lir aser la anema Official Secrets Act aser Bharatiya Nyaya Sanhita kübok ken o benoka lir.

May 18 nüa Haryana kübok Nuh district nung Police-i arrshi küm 26 Armaan apu. Pai sepaitem senzüsempogba osangtem Pakistan den lemsatepa liasü.

Asian Leadership Conference nung MP, Raghav Chadha-i jembitsü

New Delhi, May 19 (Agencies): South Korea yimtiba, Seoul nung May 21-22 anogotem nung Asian Leadership Conference (ALC) 2025 nung okila jembitsü atema Member of Parliament, Raghav Chadha jaokogo.

ALC ya Chosun Media aser Center for Asia Leadership nati senteper ayongzük. Iba conference nung alima nung lenir 320 aser yimtenren, business, shisaliok rejutem aser lokti tentet balala nungi tejaoker 2500 adentsü. Iba senden nung tanü Asia nung tayongzükba onük balala atema o lemteptsü.

Iba senden nung adentsü atema jaoka alirtem rongnung taoba mapang US Tir ana-Barack Obama aser George W. Bush na den Ukraine Tir Volodymyr Zelenskyy, taoba mapang UK Prime Minister ana- Boris Johnson aser David Cameron na, Netflix CEO Reed Hastings aser Blackstone CEO, Steve Schwarzman nung densema lir.

Iba conference nung o

jembitsüpurtem rongnung AAP nungi MP, Raghav Chadha den taoba mapang UK Prime Minister Rishi Sunak, Asia Foundation Tir Laurel E. Miller, taoba mapang Australia Prime Minister Tony Abbott, taoba mapang US Secretary of State Mike Pompeo aser Canada International Scientific Exchange Program nung Executive Director, Shawna Novak nung densema lir.

ALC 2025 nung okila jembitsü atema jaokba dak sendakba nung Chadha-i, "India tenüng nung aser lanurtem tenüng nung jembitsü atema maongka anguba ya akhümket ka lir. Tanü Asia nung temelenshi adokba mapang ka nung lenisüba, asüingsashiba aser ajak azükaruba tsütsü India tangatetba ni lemsateptsü," ta metetdaksü.

Tawa World Economic Forum-i Chadha Young Global Leader (YGL) shima liasü. Forum-i arrshi küm 40 tekübok takutet lenirtem mapa tajung ajiteta YGL shimmer.



May 19, 2025 nü Hague, Netherlands nung External Affairs Minister, S Jaishankar-i lenir kar ajurudang tangokba noksa nung angur.

India ya angati jenokdaksüba tesem ka masü: Supreme Court

New Delhi, May 19 (Agencies): Hombarnü Supreme Court-i, India ya alima tesem balala nungi refugees jenokdaksütsü atema dharamshala (angati tejenokdak) ka masü, ta ashi.

Sri Lanka nung kati India nung jenoktsü mepishiba ken o angadangba mapang nung Supreme Court-i iba oshidang agüja liasü.

Sri Lanka nung aliba kiralongrar telok Liberation Tigers of Tamil Eelam (LTTE) den tesendaktep alitsü südi ta

melung melemi 2015 küm Sri Lanka nung ka pua liasü, aser pai tejenokdak temepishiba agütsüba ken oji Justice Dipankar Datta aser Justice K Vinod nati akümba bench-i angadang.

2018 küm trial court kati Unlawful Activities (Prevention) Act kübok pa aitsü aser küm 10 tepuokdak ayutsü obendang agüja liasü. 2022 küm Madras High Court-i pa jail kümsükji küm 7 ajema kümtsü, ajisüaka linük toktsür oadokang ta tuyua khenpiga

atema refugee camp ka nung jenoktsü temelaba agüja liasü.

Sri Lanka nungba jagi Supreme Court dang pa Sri Lanka-i tanaben meyipa ora pai lendong ajurutsü ta shia India nung alitsü temepishiba agütsü.

Iba ken o angadangba mapang Justice Datta-i, "India ya alima tesem ajak nungi refugees jenokdaksüba linük ka asü? Onok nütsüng crore 140 ajanga timtemer. Iba linük ya angati jenokdaksüba tesem ka masü," ta metetdaksü.

J&K nung aliba Central shisaliok rejutemi CISF security meshir

New Delhi, May 19 (Agencies): India aser Pakistan na tsüingda raraba sülen Jammu & Kashmir nung aliba Central shisaliok reju kari sorkar dang Central Industrial Security Force (CISF) sepaitem security akhanger.

Tang Jammu & Kashmir nung aliba shisaliok rejutem nung nija agencies security dang lir. Education ministry-i J&K nung central educational institutions-i security meshiba temepishibaji home ministry nem agütsüogo.

India nung central government offices, airports, seaports, Metro facilities aser industrial units security atema CISF sepaitem lemozüksür.

Küm ishika tejaklen Madhya Pradesh nung Harisingh Gour Vishwavidyalaya nem CISF lemozükja liasü, ajisüaka sorkari iba reju dangji CISF sepaitem nem itasen agütsüba den külemi tejenokdak ki agüjang ta tuyuba sülen parnoki timtem ajangshia liasü.

Amokmeren aliba ajanga mapang shia Jammu & Kashmir nung aliba central institutions-i

sorkar dang CISF security meshir.

Ketdangser kati, "Iba ama onük nung education ministry-i telemtetba agütsü makok, ibayongji onoki iba temepishibaji home ministry nem agütsüogo. India aser Pakistan na tsüingda raraba nung ajemdaker iba takhangba agütsüba tim dang. Tensa balala koktettsü atema nija security dang nungibo CISF sepaitem tajungba," ta metetdaksü.

Ano ketdangser kati, Pakistan nung drones aika IIT Jammu aser IIM Jammu anasa senzür, ta metetdaksü.

Central University of Punjab nung ketdangser kati, May 8 nü Pakistan nung drone ka University campus anasa anguba sülen sepaitemi khazüka yok, ta metetdaksü.

Paisa, "Rajasthan, Punjab aser Jammu & Kashmir nung aliba Central Universities campus tem nung CISF sepaitem lemozüksütsüla," ta ashi.

Pakistan aser India na tsüingda rara tenzükba sülen Jammu & Kashmir nung aliba Universities nungbo tatidang-a thinena liasü.



May 19, 2025 nü New Delhi nung Union Minister, Shivraj Singh Chouhan-i Indus Waters Treaty dak sendakba nung aluyimertem den senden ka amenba sülen tangokba noksa nung angur.



TIR YIMYIM YIMOBILEM (EDITORIAL)

DIMAPUR TUESDAY, MAY (MONUPII) 20, 2025

Government onsara kümli ajung

Alima nung kümli ajunger nisungji ajak asoshi tajung, kechiyong kümli ajungerji kanga taremzük aser tashi tanga purtem lir. Aji oda, kümli ajungerjia temulung nung tamajunger dangbo jashia alitsü saka parnok dak taremzüksü tashi alinungji aremzüker aser iba jagi tali jashiteptsü melen sünepsünepa lia oteter. Ajisüaka, kibong nung süli, lokti aser yimten nung süli tsürabur aser lenirtemi pei chirnur aser nübortem madak onsara kümli junga sayura, iba jagi akhüm metsübu akümtsü aser tajung akümtsü melen tamajung kumadoktsü. Tsürabur shin o nung temeim agi mim aküm ta jembiba mapaji itemji lir. Kasaji, tanü Nagaland tilaka ya tipdema ketdangmesüteti anogo shia yimten telemtetbatem temli salali ta asütsüsa akümba ya, Nagaland government onsara kümli ajung asü mesüra onsara tashi maitang ka asütsü. Aji oda, kodang kibong nung tsürabur kanga kümli jungdir, tanurtem timi azüoka len tajung sayur mali taküm raksadoktsü, yamaji yimten nunga kodang yimsüsürtem onsara kümli junga kumdir, temzüng ozüng mamshitet akümtsü aser oda-odabo an chanu ana raratepa mebendangtsütet kuma totsü. Tanü Nagaland yimten tensa iba ama tia ka nung azüia yimdong dak nisungtem nem lenmang maitsüi tokteptsüsa kumogo. Aji oda, Nagaland tasüng ozüng alema sarusachir dang saka yimten onsara kümli ajung nungji, parnok timtemji angateta odang sarudaktsür südi. Kasaji, Nagaland ya lokti tentettem agi sünga aliba lima ka lir, anungji yimteni masü saka lokti tentettemi yimsü asür. Ibayongji, Nagaland Legislative Assembly nung lemtetba aiben mapa kuma mouteter aser Cabinet senden nung agiba telemtetbabo anogo shi melenshitsüsa akümer. Ibaji yimten nung yimsüsürtem shisatsü agi anüng asü mesüra onsara kümli ajungba agiar, government-i agiba telemtetba ka magi kuma melenshidangji tesem aika nung nübortembo akoksadagi ta bilemtsüla. Aji oda, Nagaland nung yimten nüchiso bushir telok shitakba nung kwiar mezüngdangtetsüsa kuma aoba tebilemtsü agi anogo shia nisungtem akoksadagi, ajisüaka iba jagi government nung alirtembo kecha balaka nükenbelemba mereprangteter. Aji oda, khien khien lokti tentettem jaoka senden agitsü aser khien khien lokti sentong nung Naga yimten tebilemtsü koka jembitettsüsa ken o shitak jembia odagi ta metetdaksütsü ta shia anogotem süitemdaksüba dak alaka, government nung alirtemi kenü danga Naga yimten shirangba aneptsü asoshi mozü bener arua agütsüdangba mangu aser mangashir. Aji oda, ozüng raksartem azüoka alima tajungba kuma yanglushitsü asoshi temzüng ozüng akanga amshitsü bilemer masü saka government nung alirtemiang anir ozüng raksatsü marendakra, iba limaji kechi lima asütsü ? Atangji, tang Nagaland government nung alir tangatetbaji telok ajak den kasasa 'equi closeness' tesendaktep tajung ayutsü ta ser tenzük aser yamaji jembiba dang nungibo tajungba telok ajak den tesendaktep anasatiba yur shinga mejashidaktsüi pelatepa anogo shia benjong nung senzüba angur. Ajisüaka, shin o nungsa, tanurtem asayadang awatsüng nung aliba alotembo tasür ta asüba amato, Nagaland government-i anir Naga national government metsür-semer ka den kasasa tesendaktep yur putep-putepa lia aodang nübortembo pei lu nung asentzü sena inyakba agia pei kibong memesütet timtem nung lir. Tanüa Nagaland nung shishilembaba yimti tulutiba Dimapur nungi shir tanga town-tem nung dena Nagaland Chamber of Commerce aser Industries purtemi ULB nung menden kaka meshia longkak aitba agi nübortembo kanga akoksadagi. Item ajak ya tangari bener arutsüba tebilemtsü masü saka government-i peisasa yangluba tebilemtsü lir. Ashi, tamasayongi government-i temzüng ozüng nung aliba ama indang-indanga yimten shisatsü aser tashi amshia inyak nungbo ozüng nung keta maliba shilembo shingaia meshitsü tebilema mebilemla. Atangji, government-ji nübortem asoshi anungji temeim alitsüla, iba jagi Welfare state ta amshir, ajisüaka government asoshi tongtibangtibajibo, pei lima nung ochiba agi temzüng ozüng shitak amshia terenlok mapatem inyaksü aser yimsü asütsübaji dang lir.

OLEMSABANG

Kaket zülur aser ocet züluri zülumen lirumedemtsü merangtsüla

~ L . Kika Pongener.

Kechi kin sudir suaka oshi-oben aser shisaliok nung tejakleni aoba ajanga dang kin kaji tashitemetet kin ta jangjatsür. Otsü angazüka aruba agi otsüla-oboula nungeri asen oshi 'Shiküp' nung zülüji Azü (Dog)-i chitsüa ta otsü-sutsü jembir. Yongji, asen Ao oshi jembitsüba dak alaka zülu-banglo (Alphabet) makai lia, kanga tia kaa asen tsüraburi Khristan yimsu agizüka amangbayong, Dr. Clark o pa kinungtsü Mary Mead tenati asen tsürabur dang English Alphabet aser tangar kin kar meyong Alphabet amshia azüngtsü-zülutsü sayu, aser asen Ao lima nung mezüng kaket-riju tenzüka toktsü. Ano aji dang masü Dr. Clark-i asen Ao oshi nung 'Dictionary' tilaka zülua asen Ao oshi tera yanga toktsü. Yongji, asen Ao kin Naga nunger ajak dang tamasa tamang yimsu nung dang masü shisaliok nunga tenuk lapoka nuchi kumdaoktsü. Naga nunger tangar kin shinga pei oshi nung laishiba aser ken kaket adoka mamshidang asen Ao kini tamasa adoka amshi. Aji oda, asen tsürabur mezüngpur lennir shirnoki 'Laishiba' aser 'Ken kaket' asen Ao oshi nung meyipzüka yutsüogo, parnok dang kanga peladi, kechiyong kechi mapa sudir suaka mezüng tenzüka inyaksübaji kangapo temela masü. Ano iba den Ao Senden Literature Board (ASLB)-i asen Ao oshi lirumedemtsü atema Arok Osep aser zülumen koba tashi adoktetogo, iba atema-a kanga peladi. Aji oda, tang koba tashi adoktetota lir, iba nungji mabensaba karbo alitsü akok, anungji taruba adok nung tabensaba aser tajungba adoktsü bilema alitsüla. Aserbo tang koba tashi ka adoktetota lir ibaji Aor ajaki agizüktettsüla aser anitaktsüla.

Asen Aor-i oshi tongpen ana 'Jungli oshi' aser 'Mongsen oshi' jembir. Ajioda, tip külen shisadangra oshi ana jembitsü akabaji Ao kin asoshi maongka tulu ta ashitsü akok, ano tip külen bilemdangra oshi ana jembiba jagi Aor-sa sernung oshi mangatettep timtem terabo alitsü akok. Ano junglir rongnunga yim shia ola-osu-oyim aser nungjakoja/jayajako kar-kar nungbo lirumemedemba-a lir. Ashiko, küsaji mongsener rongnunga yim shia ola-osu-oyim aser nungjakoja/jayajako kar-kar nungbo lirumemedemi alitsü akok. Ibajagi tanü tashi asen Ao kin kaket keno zülu-banglo aser zülumen nunga terarabo lirumemedemer sudi ta bilemer, kechiaser tezülur shia-i pei pei yimer-i jembiba/ajaba/amshiba amai dang zülutsü merangba agi lirumemedemer sudi ta bilemer. Anungji tang Ao Senden Literature Board (ASLB)-i Arok Osep aser zülumen Aor ajunga lirumedemtsü atema koba adoka lir, ibaji Aor ajaki agizüktettsüla aser iba denji anidaka lirumedema zülutsü merangtsüla. Tang tashi nung koba tashika adoktetogo, aji teinyakertem nubu, mapang, shisatsü aser rongsen aika endoka inyaker-ang adoktetogo. Ao oshi nung adokba osangkaket Ao Milen aser Tir Yimyim nung osang zülur, ocet zülur aser ano Ao oshi nung kaket zülur ajaki zülumen nung lirumemedemi pei pei mulongba ama dang zülura Ao kinji tejakleni aoba kin ka memesuki mapa jagi sayur.

Kanga tesasatsüka, asen oshi nung anogo shia adokba osangkaket Tir Yimyim olemsabang nung ocet zülurtemi ojang aser oren kar-kar nungpo zülumen lirumemedemi, karibo pei-i kechi shitaka ta bilemer iba amaji dang züluba angudang kanga sasaa bilemer. Aji oda, temalen shiyunga aruba amaji, tang tashi nung Arok Osep aser zülumen kechi adoktetogo, iba nungji amendaker Course kuma adoker Schools, Colleges, University nung agia odar.

(Maneni asüng adok nung...)

**Iba Olemsabang nung lemsaba ken-o aser shisatsü ya iba ocet züluri
bilemba ken-o ama tazünger agateta agitsü mepishir**

Turkey kübok Nicaea nung akhidang aliba Tenla ki samaogo



May 19, 2025: Taküm alima tesem balala nungi Khristantemi Turkey nung akhidang aliba yimti- Nicaea semdanga Church Council küm 1,700 ajungba amongtsü.

Khristan telok katia Beeson Divinity School, Bethel University aser Hillsdale College nungi professors den külemi iba yimti semdangtsü.

Ano Khristan telok kati Southern Baptist Convention, Reformed Theological Seminary aser 9Marks nung lenirtem den külemi iba yimti semdangtsü.

Ano Khristan telok aikati iba yimti semdangtsü. Iba yimti ya Turkey yimtiba, Istanbul nungi mile 90 shi pilar lir.

Akhidang aliba Nicaea yimti dang ya tangbo "znik" ta ajar. Tang iba jila nung nütsüng 44,000 shi lir. Iba yimti nung alirtemji tangbo Khristan ka danga mali, aser Amongnü anogotem nung tekülem sentong agirtem mali, kechiyong tangbo ?znik nung Tenla ki ka danga mali.

New Turkish Bible meyipzüksang aser Christianity in Turkey kaket zulusang, Behnan Konutgan-i, "Iba ya tesasatsüka lir. Khristantem atema kanga tongtibang documents renemba tesem nung ya tangbo Tenla ki ka danga mali," ta metetdaksü.

Turkey nung Khristan nütsüng ishika dang lir. Eastern Orthodox, Catholic aser Protestant Khristantemji linük nütsüng shilem 0.5-a majung.

Turkey Tir Recep Tayyip Erdo?an densema lenirtemi, Turkey nung aliba Khristantemji shidakba Turkish nunger masü, ta ashir.

Turkey linük ya secular linük ka aser linük temzüng nung yimsü temeden ajak kümzüksü shia lir, ajisüaka iba linük nung Khristantem reshikangshir.

Iba linük nung Khristantem tekülem agitsü atema Tenla ki tasen asütsü memelar, Khristan school tem mali, seminaries mesüra ministry training programs mali aser Khristan yimsü lemsateptsü atema Khristantem nem temeden magütsür.

Ajisüaka Turkey sorkari tourism atemabo alima tesem balala nung aliba Khristantem dang Jungkai Adok nung shia aliba Arogo tenet semdangtsü, tenyar Paul-i missionary mapa inyakdang ainlen senzüba tesemtem semdangtsü aser Nicaea densema akhidang aliba ecumenical councils tesemtem semdangtsü ajungshir.

Tanü tashi Khristantemi ?znik semdanga akhidang yangluba süklep 33 talang agi yimti jara aser akhidang aliba Tenla ki teraksa reprangtettsü. Tanübo akhidang aliba Tenla kiji awatsüng tzü agi rembanga lir.

Khristantemisa ano tanga Tenla ki ka reprangtettsü, ajisüaka tangbo iba Tenla kiji mosque küma yanglushiogo.

2011 küm Turkey nung culture minister Ertu?rul Günay-i, yimsü dak sendakba nung bendanger raliwalirtem anasü agi teimba akümtsü nükjidong nung pai inyaker, ta metetdakja liasü.

Osangbener den jembidang minister-i, "?znik ya raliwalirtemi sapua semdangtsüsa tesem ka lir, ibayongji onoki ?znik ajungkettsütsü meranger," ta metetdaksü.

Nicaea nung mezüngbuba Arogoji Peter-i tenzük südi ta bilemer.

Akhidang Nicaea ya Bithynia yimtiba liasü. Yisu nütsüng Peter-i Yirusalem nungi Rome-i aoba mapang nung iba yimti semdanger liasü.

Ano putiotsü nungsa, Nicaea nung Arogoji Yisu nütsüng Andrew-i tenzük ta shia lir.

Rom ketdangsertemi Nicene nung aliba Arogo-a reshikangshia liasü. 111 küm iba province nung Pliny the Younger governor akümba sülen pai Khristantem nem kangshia tamarener Trajan külemdaksü aser Yisu tenüng ataladaksü; tashi mangara tepseta liasü.

313 küm tamarener Constantine-i Khristan yimsü amangtsü atema temelaba agütsüba sülen Nicaea nung Khristantemi mezüngbuba Tenla kiji awatsüng anasa süa liasü.

Research agirtemi ashiba

agi, iba yimti nung mezüngbuba Tenla kiji Khristan lenirtem mezüng Nicaea nung adenshia 'Tebu, Techir aser Tanela Temeshi' indang jembia telemtetba agiba tesem nung asü.

Constantine-i awatsüng anasaji ki tuluka asü aser Arogo nung lenirtem jaoka Arogo longjemdaksütsü atema inyaka liasü.

Cordoba, Rome, Athens, Alexandria, Antioch aser Persia nungi Arogo nung lenirtem 300 shi Tenla kidangji adenshia liasü. Iba Tenla kiji metong nung süklep 130 aser lenden nung süklep 60 shi liasü.

Nicaea nungi Khristan lenirtem senshiba sülen tesem ajaklen Khristantemi parnok 'Nicene Christians' ta aja.

1331 küm Ottoman nungeri Nicaea atsünga agiba sülen iba yimti nüngja ?znik ta melen.

Tanü Turkey linük nung Khristan nütsüng 300,000 shi lir saka ?znik nungibo Khristan ka danga mali.

ANO GO ABEN TSÜNGREM DEN

Kü Sülen Anidakang - Matt. 16:24

Asenoki Tsüngrem tadenbaji melaa adokba ama agitsü akok. Asenoki yamaji bilemtsü akok, kechiaser Yisui ashi, Pa asenok den teti dena alitsü, asenok kolenisa odir Pai anidaktsü (Matt. 28:20). Yisui asenok sülen manidaker; asenokang Pa sülen anidaktsüla. Ne mapa nung adentsü nai Tsüngrem jaoktsü makok. Pa mapa nung adentsü Pai na jaoker. Yisui ashi, "Nenoki ni shim masü, saka Ni nenok shim" (Yn. 15:16). Yisu sülen anidaktsü bendanga tashi angaba nüngdaker. Asenoki asen asoshi tapet lemanng teyuba Pai magir. Asenok dang masüngdangi, Tsüngremi asenok asoshi tajungtibaji metet.

Yisu sülen anidakba nung nai konga majangshiba ajangshitsü ! Shirnok temenen nung pua lir, parnok asoshi Yisui ajepdang na Pa den alitsü. Yisui shia bilemba ama nai bilemtsü. Tanela tenük tapok alir, Yisu dangi arua Tsüngrem anguba tepela nai mezüngbuba angutsü. Teraksa taküm yanglushiba nai angutsü. Kibong yanglushiba; talenba nung alir salaba, chiokba; aser mangyimer süneptsüba nai angutsü. Yisu sülen anidakba tetezü yipru ajanga aoba mesüra tenem kolak nung nokdakba.

Pa sülen anidaktsü nai anentsü akok. Saka tang tanaben Pa sülen anidakner. Kodang Yisu sülen anidaktsü anener, nai ne mulungka anener. Saka Yisu dangi meyipbaji Pai mulungba nung inyaker. Pa Tsüngrem lir aser na masü. Ajaklen, mashi mapang, mashi jenjang nung nai Yisu sülen anidaktsü mulunga lir asü ? Nai Pa sülen anidaktsü akokba lemanngji aji dang lir.

Yaküm Alpha International course agir million 2 liasü

May 19, 2025: Küm 50 tejaklen Alpha International tenzükba sülen takok tuluba anguba kümji 2024 küm liasü; yaküm nisung million 2 dak temai Alpha course agiogo, aser ibaji ajanga Khristan tamang jangjatsü atema alima tesem balala nung nisungtemi iba course sapua agiba kuli angur.

Alpha ya evangelism course ka lir.

Linük 146 nung course 81,000 agi aser Arogo, organizations aser nija 43,000 dak temai yaritepa liasü. Iba course ya 1977 küm Holy Trinity Brompton, London nung tenzük aser 1990 küm nungi Rev Nicky Gumbel-i iba course ajanga continent ajak ayimjemtsü atema inyaka liasü.

Gumbel-i, "Alpha ya asen tamangba yimsü lemsateptsü atema tesem ka dang masü saka nisungtem nem pei sasa tamang jenjang bushidaktsütsü atema lenmang sayuba tesem ka lir," ta metetdaksü.

Yaküm November ita nung Alpha Youth Series tasen tenzüka liasü aser ita ishika tsüngda linük 53 nung lanur 250,000 dak temai shilem agia liasü. Yaküm Alpha nung shilem agir shilem asemsü nungi shilem kabo arrshi küm 25 ser tekübokpurtem liasü.

Lanurtem aikati tamang jenjang bushitsü aser tasüngdangba balala atema telangzüba angutsü atema Alpha sapur.

Alpha course agir Godfrey-i iba course agiba ajanga tesünep anguba lemsatep.

"Tamang tia nung timtem jenti aliba mapang nung ni-a iba kibong nung züngok aser ni merajemba aika angateta aküm," ta pai metetdaksü.

Nigeria nunga Darius-i lanurtem atema Alpha courses agütsü tenzük aser ibaji ajanga pa taküm nung temelenshi tulu adokba pai lemsatep.

"Alpha ajanga Tsüngrem meimertem aser Tsüngrem jangjatsü meranger lanurtem

aika den sendaktep," ta pai metetdaksü.

London nung aliba Alpha headquarters nungi otongdar kati, "Alpha nung onoki aika den medemer akümer aser tamang jenjang bushir. Onoki taginüba tulutibaji meimchir shisatsü dang nungi tuluba lir aser ibaji Tsüngrem yimli angutsü atema lir," ta metetdaksü.

UK nung Arogotemi pei nüburtem ayongdentsü merangba mapang nung tanela asentenshi milak atema Alpha ya hadir ka ama kümogo.

Nicky Gumbel-i, "Arogotem ajanga inyakra Alpha ya tenyaba wadang inyaktsü atema lenmang ka lir. Iba model ya nüburtem tsüngda tesendaktep aser Arogo taküm nung tera yanga lir," ta metetdaksü.

Alpha ya küm 50 shi tejaklen West London nung aliba Arogo ka nung tenzük, ajisüaka tangbo iba ya global movement ka kümogo.

AO OSHI ANGAZÜKDAK:**TANÜ ANGAZÜKTSÜBA OJANG****Tena**

(Pronoun) nisung ana indang ashiba (two of them)

* Tena yim ka nungi dang lir.

Tena

(n) tesaret alidak temang shilem (surface portion of ribs)

* Tsüngremi tena nungi tesaret ka agiteta tetsür yanglu.



Tir Yimyim

OLONG PAITEP # 7156

1			2			3			4	
			5		6		7			
8										
			9							
	10									
								11		12
			13				14			
15						16				

TIPIEN

1. Anenzükdak ki
3. Asür mangyimba
5. Temulung nung shisadang
8. T ____ lu
10. Takdang temalen
11. Tesa ____ a
13. Ajungbena temulungjang
- tongtonglatsü atu
15. Tejen lai nung tesayur
16. Tsüingsak-mopung

-(5)

-(5)

-(5)

-(3)

-(9)

-(3)

-(5)

-(5)

-(5)

-(5)

LANGTSÜNGLEN

1. Reprangdaksü
2. ____ ur
4. Kiojen yangludak
6. ____ ait
7. Nagaland nung ayong ka
9. Küm kasa purtem
10. Tetsüing tajemtdak
12. ____ adenshi
14. Tsünüsönongtsü adokdak

-(4)

-(3)

-(6)

-(7)

-(5)

-(5)

-(6)

-(4)

-(3)

OLONG PAITEP # 7155 TELANGZÜBA**TIPIEN :**

1. Kasa, 6. Rangben, 7. Mait,
9. Poktet, 11. Ati, 13. Atasa,
6. Rür, 17. Rajang, 20. Lanu,
24. Nüingjem, 25. Sürä.

LANGTSÜNGLEN :

1. Khu, 2. Süjak, 3. Onük, 4. Oba,
5. Anü, 6. Ratet, 7. Mozü, 8. Ita,
10. Tar, 12. Tinu, 14. Salem,
15. Aja, 18. Anünü, 19. Tajü,
21. Ano, 22. Onü, 23. Kua.

NAI-A YA METETTER MA

Italy nungger Massimo Stano-i May 18, 2025 nü "Men's 35-km race walk world record" yanglutetogo.

Podebrady nung European Race Walking Team Championships nung pai minute 20 ser second 43 nung kilometer 35 jajatet. Stano-isa 2022 World Athletics Championships nung 35-km race walk nung gold nguteta liasü.

Tanur asoba anogo nung salem osang den noksa angati adokdaksünöra - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimiyim@gmail.com nung yokang mesüra Tir Yimiyim bureau tem nung agüjang.

PM Modi-i Sikkim Rs 50 commemorative coin sayatsütsü

Gangtok, May 19, 2025 (Agencies): Prime Minister Narendra Modi-i May 28, 2025 nü Paljor Stadium, Gangtok nung Rs 50 commemorative coin ka sayatsütsü.

May 16, 1975 nü Indian Union nung Sikkim ya shilem ka akümbe sülen küm 50 abensaba nüngtem nung commemorative coin sayatsü.

Iba sentong nung Sikkim

Chief Minister Prem Singh Tamang-i anir minister tem aser tongtipang nisungtem adentsü.

CM Tamang-i May 14, 2025 nü Prime Minister-i Sikkim semdangtsüba osang metetdakja liasü.

"Rs 50 commemorative coin ya pure silver 40 grams agi yanglutsü. Külen tsütsü Sikkim küm 50 aruba indang artistic design nung '50 Glorious Years

of Sikkim' Hindi aser English agi zülutsü" ta numismatist Sudhir Lunawat-i ashi.

Maneni commemorative coin külen tsütsü Lion Capital of Ashoka den ? symbol aser numeral 50 alitsü ta paisa ashi.

Iba coin ya Kolkata nung aliba Government of India Mint nung yanglutsü. May 13, 2025 nü Ministry of Finance-i Gazette Notification ka ajanga sangdonga liasü.

Iba coin sayaba sülen collectors-i Kolkata Mint nungi non-circulating coin angutsü akok.

Paljor Stadium nung "Golden Jubilee Conclave" nung sobaliba sentongtem agitsü. Iba dak alia exhibitions, aser Sikkim putiotsü dak sendakba interactive dialogues alitsü.

Meghalaya Speaker-ia RIMS kaketshir asüba bushisüngdang südaksünür

Shilllong, May 19, 2025 (Agencies): Regional Institute of Medical Sciences (RIMS), Imphal nung nursing student Abiel Salchiana Ch. Marak asüba bushisüngdang asütsüla ta Meghalaya Assembly Speaker aser North Tura MLA Thomas A Sangma-ia takhangba agütsüogo.

"Tasür kibongi aginüra bushisüngdang asüba nung ni yariteptsü. Ajisüaka iba atema

tasür kibong den tamasa asüngdangteptsü" ta Thomas Sangma-i ashi. "Iba atema sasar aser nisungtemi bushisüngdang asütsü akhangar, saka tang ni balaka meshitetsü" ta pai ashi.

Confederation of Meghalaya Social Organisations (CoMSO) aser Garo Students' Union (GSU) ajanga independent judicial inquiry asütsü takhangba agütsüogo.

GSU-i RIMS administration

dang iba bushisüngdang maparen nung yariteptsü ayongzükogo. Parnokisa kaketshir soseta asütsüsa nisung kari dang langka kar inyaka lira RIMS nungi anentsütsüla ta takhangba agütsüogo.

GSU-i arishi küm 21 tain Abiel asüba bushisüngdangtsü akhangba nung Meghalaya Pradesh Youth Congress-ia pusema nungitba metetdaksüogo.

Manipur police-i telungpur 4 dena nisung 14 apu

Imphal, May 19, 2025 (Agencies): Manipur nung sepaitemi nisung 14 apu aser parnok rongnung telungpur 4 densema lir.

Bishnupur district kübok Kumbi Setupur tenemtsünglen civil police aser central security forces külem telok kati mita ao.

Idangji parnoki iba tesem nung temulung melemi bilemba nisung 10 apu. Parnokisa Kumbi village nung kilen shia sema mita ao.

Iba mapang prangpong aser protective equipment aika ngutetogo. Parnoki sub-machine carbines, modified carbine machine gun, double-barrel gun,

aser 9 mm pistol nungger angu.

Maneni, sepaitemisa mita aodang People's Liberation Army (PLA), Kangleipak Communist Party (People's War Group), United National Liberation Front-Pambei faction (UNLF-P), aser Kanglei Yawol Kanna Lup (KYKL) züngsem kaka apu.

Assam police-i Rs 3.16 crore alang heroin apu

Guwahati, May 19, 2025 (Agencies): Assam Police-i Rs 3.16 crore alang heroin gram 395.67 puogo aser iba dak sendakba nung mozü shibelener pa pua lir.

Police-i Silchar nungi Guwahati

leni aoba gari ka soter mita reprangdang heroin bena aliba apu.

"Miim osang ka nung ajemdaker Guwahati Police-i gario ka mita reprangdang Rs 3.16 crore alang heroin gram 395.67 apu" ta Assam Chief

Minister Himanta Biswa Sarma-i metetdaksü.

"Iba dak sendakba nung police-i mozü shibelener ka puogo aser Assam-i maneni drug networks anema inyaktüsü" ta Chief Minister Sarma-i ashi.

Liberal mayor Nicusor Dan-i Romania tir election kokogo



Bucharest, Monupii/May 19 (Agencies): Romania tir election nung Bucharest indang mayor aser EU bhukumer Nicusor Dan-i Romanian right-wing nationalist madak takok nguogo.

Ita tetenzüklen vote agütsüba nung far-right AUR party lenir George Simion-i takok ngua liasü, koba Russia-i shilem agi ta tai tonglochtsüba yong taoba küm agiba tir election tazüngla kumja liasü.

Bendang lima nung prokshia alirtemi Simion bhukumaka ola tanük Nicusor Dan-i vote shilem 53.6 ngua takok angu.

"Nenoki vote shiba nem agütsür liaka asenok külemi Romania yangertsü nüngdaker," ta Dan-i takok anguba sülen ashi.

Deobarnü agishiba election nung Romania nung million 11.5 shi-i vote agüja liasü aser Dan-i parnok million trok dak tema indang vote atsür arutet.

Pai takok jangjatsü atema Deobar aonung ayatirm tashi ataba sülen Bucharest nung City Hall tezülen pa bhukumer den oa aden.

"Temelenshi aginüba Romania nung temi takok nguogo," ta Dan-i ashi.

Mainstream party temi amokbangba aser European Union aser NATO züngsem linüktem nung mepetmesü adokba ajanga Romania nung aika mepelai liasü.

Nicusor Dan-i ochimashi anema raratsü aser north-east tsütsü kidanger Ukraine yaritsü asoshi nübuyima liasü, saka Simion-i EU anema nokdak aser Kyiv nem teyari magütsütsü jembia liasü.

"Russia, tamadok, Romania ya ner meyong masü," ta Dan bhukumer temi yimyim ayima liasü.

Exit polls nung pai takok angutsü ama sayuaka yangji

bendang lima nung aliba vote mazüng aser Simion-i itemji mezüngshie takok angutsü imlaa liasü.

"Ni kokogo, ni Romania indang tir tasenba aser ni Romania nung nem tashi meyipa agütsür," ta pai mezüngbo jembia liasü.

Ajisüaka Hombarne ang pai Facebook nung tamakok ajuruba agizüka liasü. Pa bhukumer temi longkak aittsü sentong aliba anen.

Election nübuyimba mapang Simion ya Calin Georgescu den külemi nokdaka liasü, shibai taoba küm tatemlen tir election agiba nung takok ngua Romania aoksatsü.

Ajisüaka nübuyimba mapang shikulak mapa inyak aser Russia-i teka amushi ta tai tonglokja iba vote ya magi aser Georgescu ya tanaben tokteptsü memela. Russia-i shilem magi ta ashir.

Russia-i Amnesty International ya "undesirable organisation" ta sangdongogo

Moscow, Monupii/May 19 (Agencies): Russia nung aliba ketdangsür temi global human rights group Amnesty International ya "undesirable organisation" ta sangdongogo, koba par linük indang national security nung tetsükdaksü agütsüba telok tem nem agütsür.

Russia indang prosecutor general-i sangdong ka nung Amnesty indang London office ya "global Russophobic projects" renemba tiyongtsü liasü ta ashi aser Ukraine tenüng nung jembia inyaker ta aitsü.

Iba rights group yagi region nung mitkartem tsüngta tesashiba nung raratsü asoshi akokba mapa ajak inyaker, ta parnokisa aitsü. Parnoki Ukrainian neo-Nazis ajanga mapa tamajung inyakba kuli agütsü aser parnok senotsü teyari agütsütsü ayongzükbä tali akumer aser asen linük yimtenren aser rongsenketzüng azüngmeyaka yutsütsü meranger ta ashi.

Tang tashi Amnesty nungibo telangzüba kecha mali.

"Undesirable" nüngja agütsüba tetetzü London nung amenoka aliba rights group ya

Russia nung inyakyim ajunga anentsüla. Iba ama nüngja agüja aliba telok nung inyakba Russia nungertem tepuokdak küm pongu tashi ayutsü özüng ka 2015 küm yanglua lir.

Russia-i taoba mapang iba ama lokti tentet tem nokdangba rongnung international organisation Greenpeace aser US sorkari yariba broadcaster Radio Free Europe/Radio Liberty dena lir.

Kasa mapang Russia-i tashi ajak amshia Ukraine amak tenzüker küm asem dak tali lir Turkey nung linük ana tsüngta indang-indanga jembishinüba nung ceasefire asoshi tezüngzüktep kecha makai senden tembang. Istanbul nung aliba Dolmabahce Palace nung ghonda ana majung senden amendang ceasefire asoshi telemtetba kecha magi, saka linük anaprong nungi prisoners of war nisung 1,000 melenteptsü tezüngzüktep ka agia liasü.

Iba senden nung Ukraine delegation Rustem Umerov-i iba senden tembangba sülen osangbener den jembidang, iba sülen mera yabo linük ana lenir tsüngta jembiba asütsü Kyiv-i

amanger ta shia liasü.

Russian negotiating team anisang Vladimir Medinsky-i ashiba agi, linük anaprongi ceasefire atema pei-pe proposals lemsateptsü aser lenir tsüngta senden amentsü mulungtepogo. Iba senden nung jembishinüba nung Moscow temulung asür aser ano maneni Kyib den jembishinütsü renema lir, ta pai ashi.

Ukraine Tir Volodymyr Zelenskyy, shibai Russia Tir Vladimir Putin den tejak o tejak jitepa ajuruteptsü jazük, saka Moscow-i telemtetba agitsü tashi maliba low-level delegation ang yok, ta aitsü.

Kasa mapang Putin-i Trump den nikongdang 5:00 ako (Moscow time) nung jembitsü ta Kremlin-i tejangja shiogo.

Iba mapang Istanbul nung taoba hopta Russia aser Ukraine ketdangsürtem jembishinüba indanga süoka jembitsü, ta Russia odongtar Dmitry Peskov-i ashi.

Lenir ana tsüngta sensaksemba ya tongtipang lir aser Russia taginüba metetdaksüogo, ta Peskov-isa ashi.

UNGMA IMPANG TANÜJANG KIDONG TENÜNGSANG AGÜTSÜR

Ungma Impang Tanüjang Kidong ajanga özü kin nungi item lanurtemi pei luyim nung takok tulu ngutetba asoshi khonang tetushi agütsür.

1. Wb. T. Nükshi Longkumer aser Wt. T. Amongla Jamir tena jala **Ms. Toshinenla T. Longkumer**, NPSC ajanga agiba CTSE 2024 tatidang nung Department of Technical Education kübok Demonstrator (Architecture) mapa angu.
2. Wb. S. Nüngmoaba Longkümer aser Wt. Tsükjemmongla Jamir, tena jabaso **Dr. Imnameren Longkumer**, Harvard T.H. Chan School of Public Health India Research Centre nungi NAROTAM SEKHSARIA FELLOWSHIP senpet angu.

Item takoktem asoshi shirisa tenüngsang agütsüogo, özü Tanüjang Kidongi nenok ajak dang pelaba metetdaksür. Tsüngremi nenok taküm maneni moajangma.

Sd/-
Rongsenpokba, Tatar

Sd/-
Lanusüngküm, Tatar

DIMAPUR YAONGYIMSEN IMLIJUNG ELANGTSÜR TELONGJEM

Konang Tetushi Agütsür

Wb.C.Bendang Ao aser Wt.Tinula na jala **Kr.Amenla Imsong** aser Wb.Imtione Imsong aser Wt.Imsuinla na jala **Kr.Shilumenla Imsong**, tenati Common Educational Services Examination (CESE) 2024 ajanga Department of School Education kübok Post Graduate Teacher (Mathematics), mapa inyaksüsa jenjang tajung nguteta konang nüngsang bener arutsü nung, tenaprongla dang kanga pelar aser tenüngsang tulu agütsür.

Tsüngremi nena taküm aser watang nung ano maneni moajangma.

Sd/-
Amongla
President.

Sd/-
Limala
Secretary.

Gaza-i teyari yoktsü mulunga agizükba sülen Israel-i Palestine nung 20 tepset

Cairo, Monupii/May 19 (Agencies): Israel-i Gaza nung military inyakyim maneni benoka inyaka Hombarnü manger mesangwa tsüngda tesem balala amakba mapang Palestine nung 20 tepsetogo.

Teyari balala bener meyoktsü atema ita ana tashi tenokdangba agütsür aliba agintsü mulunga agizükba sülen iba jenjang ya agia liasü. Tenokdangba agütsüba ajanga iba enclave ya aya wara agi meneptsü ana nung liasü.

Ato Kilonser Benjamin Netanyahu-i Deobarnü ashiba agi, parnoki dang inyakyim ka benoka inyaka aliba kübok Gaza ajunga aziüoktsü nükjidong lir, aser teyari balala bener yokba Hamas pur nem mauyadaksütsü. Hamas puri ashiba agi, auyaba nung parnok shilem kecha mali.

Israeli military-i ashiba agi, "Operation Gideon's Chariots" ta nüngja agütsür sentong tasen ka benoka inyakba nung densema aliba sepaitem Gaza ajunga nung kanga yakyaka inyakdar aser parnok yagi Hamas military aser parnok yimsüsütsü tashi ajunga raksatsütsü, aser 2023 küm October ita pur aoertem meyipa anir arutsü atema inyakdar.

Netanyahu indang office sangdong ka ajanga Deobarnü ashiba agi, parnoki tenokdangba agütsür aliba agintsü aser Gaza-i chiyongtsü tatakzük kar bener yoktsü.

Palestine nung media sangdong balala ajanga ashiba agi, flour, sorchiok dang amshiba

totzü aser legumes bener truck 50 Hombarnü nikongtsütsü yoktsü. Kasa mapang nung Israel media-i, tanurtem chiyongtsü bener truck trok Hombarnü yoktsü imlar, ta metetdaksü.

Gaza-i aiba Kerem Shalom crossing nungi Reuters osangbener kati ashiba agi, anepdang tashi nung kecha inyakyim maliasü aser UNRWA, United Nations refugee agency for Palestinians nungeri ashiba agi, teyari kodang yokdir mesüra yokra iba mapang osangbenertem nem osang agütsütsü.

Israel-i March ita ceasefire yanglur aliba meraksa tsüngda humanitarian teyari kecha bener meyoktsü atema tenokdangba agütsüba sülen linüktemi iba tenokdangba ya agintsü khanga aruogo. Aid agency temia nisung million 2.3 aliba enclave ya ayawara agi meneptsü ana nung lir ta tekümdangtsü mettedakja aruogo.

Teyari balala lemtsüba nung densema aliba transport company ka kibur Nahed Shheibar-i Gaza nungertem dang truck tem menokdangtsü mesüra mauyatsü mepeshia liasü.

Kasa mapang nung Gaza nung alir aser medic temi ashiba agi, Gaza nung Hamas-i aniba Palestinian militants tem anema army-i jenjang agiba mapang Israel indang undercover force kati south len tesem ka meita aoba mapang telungpur lenir ka tepsetogo.

(Maneni tapak 8 nung...)

BCCI-i ACC event tem nung shilem magitsü telemtetba magi: Saikia



Monupii/May 19, 2025

(Agencies): Pakistan sentoka toktsütsü atema Asian Cricket Council (ACC)-i ayongzükba asayamung ajak nung shilem magitsü atema BCCI-i telemtetba agiogo ta osang prokshiba ya shitak masü ta Board of Control for Cricket in India (BCCI) secretary Devajit Saikia jangjashitsüogo.

Kidanger linük ana tsüngda mangatettep adokba sülen iba osng ya prokshia liasü.

Saikia-i Hombarnü ashiba agi, "tanep nungi BCCI-i Asia Cup aser Women's Emerging Teams Asia Cup ta ACC indang

asayamung nung shilem magitsü atema telemtetba agiba indang osang prokshiba onoki angashidar."

"Iba amala osang ya teyazü, kechiyong BCCI-i iba dak sendakba nung sensaksem agia mali mesüra taruba ACC asayamung dak sendakba nung kecha telemtetba magi aser aji toktsür ACC dangi kecha shiti zulua mali. Tang onok IPL aser iba sülen England den asayamung dak rangloker lir.

"Asia Cup msüra ACC asayamung dak sendakba nung onok kecha sensaksema mali anungji iba dak sendakba nung

osang kechisa adokdir ajaki shitak masü aser pei tebilemba jembiba dang lir. BCCI-i kodang ACC asayamungtem mesüra togtibang ken o tem dak sendakba nung telemtetba agidir idangji media nem osang metetdaksütsü," ta Saikia-i shimsem.

Osang ajanga ashiba agi, BCCI-i Women's Emerging Teams Asia Cup nung shilem magitsü atema ACC nem osang agütsüogo, koba taruba ita Sri Lanka nung asayatsü lir. Kasa mapang nung September ita asayatsü aliba Men's Asia Cup ya India nung ayongzükba asayatsü lir.

Osang ajangsa, iba jenjang agiba kuli kaji, ACC ya Mohsin Naqvi lenisüba nung inyaksangshir, shiba Pakistan Cricket Board (PCB) mendenbuba dang masü saka Pakistan indang Interior Minister lir.

Asia Cup ya Semteperber ita India nung asayatsü lir aser India-i iba asayamung nung shilem magitsü telemtetba agira tetsükdaksü tulu asütsü. Maneni India aser Pakistan na asaya melira iba asayamung ya kecha jangrademtsü masütsü.

Ajax Coach Francesco Farioli-i mapa toktsüogo



Monupii/May 19, 2025

(Agencies): Ajax-i, head coach Francesco Farioli-i club indang board dang pai mapa toktsütsü atema telemtetba agiba metetdaksüogo ta club-i jangjatsüogo. Netherlands' top flight tetoktepa nung Eredivisie sülen tanabuba jenjang nung tembangba sülen pai iba telemtetba agia liasü.

Ajax puri league akoktsü imla liasü saka parnok point teku agi tejakdang aliba maongka magitet aser asaya pongu anunga lia parnoki junga masayateti PSV Eindhoven nem parnok ajatetdakja parnoki Dutch league kokogo.

"Toba mapang ama jenjang junga kümdaksütsü nükjidadong nung ni Ajax nung küm ka tejakdang De Toekomst nung inyaka tenzük aser Johan Crujff Arena nung tembang aser Ajax pur Champions League

asayatsü maongka ngutetogo, koba European football nung asayamung tulutiba lir.

"Ni 1998 küm sülen tang tashi nung Ajax indang non-Dutch coach aser Italy nunger coach mezüngbuba liasü, koba maogka tulu ka liasü. Kü staff tem den külemi onoki tayongzükba, khuret aser takok angutsü atema temulungtetba tulu akümtsübua agizükogo. Season tepeyong Ajax fan temi onok akümtsübuba aser nongita yariba onoki ajangshiogo koba ni aser kü staff tem atema kanga tulu lir. Season tepeyong jenjang tajung tamajung ajak ajangshiaogo aser nükjidadong tonga asayaogo," ta Farioli-i ashi.

Johan Crujff Arena nung Ajaz puri season nung tatembangbuba asayabo koka liasü. Asaya tembangba sülen Farioli kanga temulung raksa liasü aser iba ajanga fan temi pai club toktsütsü akok ta bilema liasü. Paisa, club nung tarutsü dak sendakba nung kecha tenangzükba magütsü aser ashiba agi, Ajax tarutsüji ajak dang tongtibangba lir.

Osang ajanga ashiba agi, club board aser tena tsüngda mangatettep aliba ajanga pai club toktsütsüsa aküm.

Alcaraz-i Italian Open final nung Sinner kokogo



Monupii/May 19, 2025

(Agencies): Spain nunger asayar Carlos Alcaraz-i Deobarnü Italian Open final nung top-ranked Jannik Sinner 7-6 (5), 6-1 agi koka iba asayamung mezüngbuba kokogo.

Taoba küm nungi Alcaraz kijai Sinner ya khien dak timbaben koka lir aser pai tang agi pezübenbuba atonga kokogo.

Foro Italico nung Alcaraz-i kidang fan tem matsüngdang Sinner akokba sülen pa taoba küm October ita nungi khien danga tamakok mongui asaya aliba Alcaraz-i tembangtsüogo. Toba küm October ita ya Alcaraz-i China Open final nung Sinner koka liasü aser iba sülen pa khien danga tamakok

mongui asaya aruogo. Tena tsüngda asaya Alcaraz-i 7 ben aser Sinner-i 4 ben koka lir.

Tenokdangba agütsür aliba mozü amshiba atema ita asem tenokdangba agütsüba tembangba sülen Sinner tang mezüngbuba iba asayamung nung shilem agia liasü.

Iba asaya akokba sülen Alcaraz ya French Open akoktsü imlar rongnung ka kümogo, koba taruba Deobarnü tenzüktsü.

January ita Australian Open nung Grand Slam tasembuba akokba sülen Sinner tang mezüngbuba asayamung ka nung asaya liasü.

February ita Sinner-i World Anti-Doping Agency-i it asem atema tenokdangba agütsüba agizükba liasü aser iba ajanga pa

Grand Slams ajak asayatetsü maongka agütsüogo.

Iba asaya akokba sülen Grand Slam pezü koker alisang Alcaraz ya taküm clay-court asayamung asem tashi final tonga asayaogo aser pa ranking nung No. 2 asayar kümogo. Pai Monte Carlo Masters akok aser iba sülen Barcelona Open nung tanabuba jenjang nung tembang. Pa Madrid Open nungbo yiruba ajanga masayatet.

2022 aser 2023 küm Madrid Open akokba sülen Alcaraz ya Rafael Nadal, Novak Djokovic, Gustavo Kuerten aser Marcelo Rios nunger sülen Masters 1000 clay events asemprongla akokba asaya pongububa kümogo.

BENDANGLI OSANG : Tapak 7 nungi...

Gaza-i teyari yoktsü mulunga agizükba...

Israel nunger sepaitemi Hamas den sendaktepa aliba telungpur telok Popular Resistance Committees indang commander Ahmed Sarhan tepsetogo. Sepaitem ya pei ki toktsür jenshia or alirtem ama renemer oa Khan Younis yimti teyongi ai aser Sarhan ya tepseta liasü, ta medic temi ashi.

Iba tesem nung alirtemi ashiba agi, Sarhan metepset tsüngda pai sepaitem den rara liasü aser Israel nunger sepaitemi pa kinungtsü aser tanur sota ayuba sülen bus ka nung mener anütoklen arrtsü leni jena ao.

"Parnoki jara nung tapok ka apa aser kidangi ia tebuti ya tepset aser par arishi küm 11 tain tanur aser tetsü pur meyipa ao," ta tenük kuli agütsür Mohammed Sarhan-i ashi.

Palestine nunger health ketdangsürtemi ashiba agi, Israel-i tesem balala tali amak tenzükba sülen anogo ti tsüngda nisung 500 dak tema tepsetogo.

Israel aser Hamas na Qatar nung ceasefire atema indirect sensaksem tenzükshiba kecha tajangzü kaa sensak mesemetba telok anapronglai metetdaksüba sülen Israel-i

teyari balala bener yoktsü telemtetba agiba sangdonga liasü.

Netanyahu-i ashiba agi sensaksem nung ceasefire aser tepuokertem chioktsü atema sensak asema den mintoker aliba Hamas militant aser Gaza demilitarization melenara anentsü asoshi sensaksema liasü, koba taoba mapang Hamas puri magizük.

Doha nung sensaksem tejakdangi bener motetba atema Hamas ketdangsür tejen Sami Abu Zuhri-i Israel dak tai tongloktsüogo aser ashiba agi parnoki tesem balala tali amakba ajanga tepuokertem lendongbang nung toktsütsü.

Hamas-i taoba mapang Israel-i anüng ajanga amakba mapang tepuokertem ishika asüba osang metetdaksüogo. Kasa mapang nung Hamas puri parnok ket nung aliba tepuokertem tepsetba atema Israel-i parnok aitsüogo.

Israel-i ali aser anung ajanga Gaza amakba sülen iba tesem nung alirtem timba pei ki toktsür aotsüsa kümogo aser nisung 53,000 dak tema tepsetogo, ta Gaza health authorities-i ashi.

BILEMDANGANG

"Nai inyaknüba inyakba ya nujiso ama lir."